

摘藻堂四庫全書薈要

史部

欽定四庫全書薈要

史部  
通志卷一百七下



詳校官員外郎臣楊世綸

欽定四庫全書叢要卷九千十六

史部

通志卷一百七下

宋 右 迪 功 郎 鄭 樵 漁 仲 撰

東 列 傳 第二十下

馮衍字敬通京兆杜陵人也祖野王元帝時為大鴻臚  
衍幼有奇材年九歲能誦詩至二十而博通羣書王莽  
時諸公多薦舉之者衍辭不肯仕時天下兵起莽遣更  
始將軍廉丹討伐山東丹辟衍為掾與俱至定陶莽追

詔丹曰倉廩盡矣府庫空矣可以怒矣可以戰矣將軍受國重任不捐身於中野無以報恩塞責丹惶恐夜召衍以書示之衍因說丹曰衍聞順而成者道之所大也逆而功者權之所貴也是故期於有成不問所由論於大體不守小節昔逢丑父伏軾而使其君取飲稱於諸侯鄭祭仲立突而出忽終得復位美於春秋蓋以死易生以存易亡君子之道也詭於衆意寧國存身賢智之慮也故易曰窮則變變則通通則久是以自天祐之吉

無不利若夫知其不可而必行之破軍殘衆無補於主  
身死之日負義於時智者不為勇者不行且行聞之得  
時無怠張良以五世相韓椎秦始皇博浪之中勇冠乎  
賁育名高乎泰山將軍之先為漢信臣新室之興英俊  
不附今海內潰亂小人懷德甚於詩人之思召公也愛  
其甘棠而況子孫乎人所歌舞天必從之方今為將軍  
計莫若屯據大郡鎮撫吏士砥礪其節百里之內牛酒  
日賜納雄桀之士詢忠智之謀要將來之心待從橫之

變興社稷之利除萬人之害則福祿流於無窮功烈著於不滅何與軍覆於中原身膏於草野功敗名喪恥及先祖哉聖人轉禍而為福智士因敗而為功願明公深計而無與俗同丹不能從進入睢陽復說丹曰蓋聞明者見於無形智者見於未萌況其昭哲者乎凡患生於所忽禍發於細微敗不可悔時不可失公孫鞅曰有高人之行負非於世有獨見之慮見贅於時故信庸庸之論破金石之策襲當世之操失高明之德夫決者智之

君也疑者事之役也時不重至公勿再計丹不聽遂進  
及無鹽與赤眉戰死衍乃亡命河東更始二年遣尚書  
僕射鮑永行大將軍事安集北方衍因以計說永曰衍  
聞明君不惡切慙之言以測幽冥之論忠臣不顧爭引  
之患以達萬機之變是故君臣兩興功名兼立銘勒金  
石令問不忘今衍幸蒙寬明之日將值危言之時豈敢  
拱默被罪而不竭其誠哉伏念天下離王莽之害久矣  
始自東郡之師繼以西海之役巴蜀沒於南夷緣邊破

於北狄遠征萬里暴兵累年禍挈未解兵連不息刑法  
彌深賦斂愈重衆彊之黨橫擊於外百僚之臣貪殘於  
內元元無聊饑寒並臻父子流亡夫婦離散廬落丘墟  
田疇蕪穢疾疫大興災異蜂起於是江湖之上海岱之  
濱風騰波涌更相駘藉四垂之人肝腦塗地死亡之數  
不啻大半殃咎之毒痛入骨髓匹夫僮婦咸懷怨怒皇  
帝以聖德靈威龍興鳳舉率宛葉之衆將散亂之兵挿  
血昆陽長驅武關破百萬之陳摧九虎之軍雷震四海



席卷天下攘除禍亂誅滅無道一晷之間海內大定繼  
高祖之休烈修文武之絕業社稷復存炎精更輝德冠  
往初功無與二天下自以去亡新就聖漢當蒙其福而  
賴其願樹恩布德易以周洽其猶順驚風而飛鴻毛也  
然而諸將虜掠逆倫絕理殺人父子妻人婦女燔其室  
屋掠其財產饑者毛食寒者裸跣冤結失望無所歸命  
今大將軍以明淑之德秉大使之權統三軍之政存撫  
并州之人惠愛之誠加乎百姓高世之聲聞乎羣士故

其延頸企踵而望者非特一人也且大將軍之事豈得  
珪璧其行束修其心而已哉將定國家之大業成天地  
之元功也昔周宣中興之主齊桓霸彊之君耳猶有申  
伯召虎夷吾吉甫攘其蝥賊安其疆宇況乎萬里之漢  
明帝復興而大將軍為之梁棟此誠不可以忽也且衍  
聞之兵久則力屈人愁則變生今邯鄲之賊未滅真定  
之際復擾而大將軍所部不過百里守城不休戰軍不  
息兵草雲翔百姓震駭奈何自怠不為深憂夫并州之

地東帶名關北逼彊胡年穀獨熟人庶多資斯四戰之地攻守之場也如其不虞何以待之故曰德不素積人不為用備不豫具難以應卒今生人之命懸於將軍將軍所杖必須良材而改易非任更選賢能夫十室之邑必有忠信審得其人以承大將軍之明雖則山澤之人無不感德思樂為用矣然後簡精銳之卒發屯守之士三軍既整甲兵已具相其土地之饒觀其水泉之利制屯田之術習戰射之教則威風遠暢人安其業若鎮太

原撫上黨收百姓之歡心樹名賢之良佐天下無變則  
足以顯聲譽一朝有事則可以建大功惟大將軍開日  
月之明發深淵之慮鑒六經之論觀孫武之策省羣議  
之是非詳衆士之白黑以超周南之迹垂甘棠之風令  
夫功烈施於千載富貴傳于無窮伊望之策何以加茲  
永既素重行為且受使得自置偏裨乃以行為立漢將  
軍領狼孟長屯太原與上黨太守田邑等繕甲養士扞  
衛并土及世祖即位遣宗正劉延攻天井關與田邑連

戰十餘合延不得進邑迎母弟妻子為延所獲後邑聞  
更始敗乃遣使詣洛陽獻璧馬即拜為上黨太守因遣  
使者招永衍永衍等疑不肯降而忿邑背前約衍乃遺  
邑書曰蓋聞晉文出奔而子犯宣其忠趙武逢難而程  
嬰明其賢二子之義當矣今三王背叛赤眉危困天下  
螳動社稷顛隕此忠臣立功之日志士馳馬之秋也伯  
玉擢選剖符專宰大郡夫上黨之地有四塞之固東帶  
三關西為國蔽奈何舉之以資彊敵開天下之肉假仇

讐之刃豈不哀哉衍聞之委質為臣無有二心挈瓶之  
智守不假器是以晏嬰臨盟擬以曲戟不易其辭謝息  
守郕脅以晉魯不喪其邑由是言之內無鉤頸之禍外  
無桃菜之利而被畔人之聲蒙降城之恥竊為左右羞  
之且邾庶其竊邑叛君以要大利曰賤而必書莒牟夷  
以土地求食而名不滅是以大丈夫動則思禮行則思  
義未有背此而身名能全者也為伯玉深計莫若與鮑  
尚書同情戮力顯忠貞之節立超世之功如以尊親係

累之故能捐位投命歸之尚書大義既全敵人紓怨上不損剖符之責下足救老幼之命申眉高談無愧天下若乃貪上黨之權惜全邦之實衍恐伯玉必懷周趙之憂上黨復有前年之禍昔晏平仲納延陵之誨終免欒高之難孫林父違穆子之戒故陷終身之惡以為伯玉聞此至言必若刺心自非嬰城而堅守則策馬而不顧也聖人轉禍而為福智士因敗以成勝願自彊於時無與俗同邑報書曰僕雖駑怯亦欲為人也豈苟貪生而

畏死哉曲戟在頸不易其心誠僕志也間者老母諸弟見執於軍而邑安然不顧者豈非重其節乎若使人居天地壽如金石要長生而避死地可也今百齡之期未有能至老莊之間相去幾何誠使故朝尚在忠義可立雖老親受戮妻兒橫分邑之願也間者上黨黠賊大眾圍城義兵兩輩入據井陘邑親潰敵圍拒擊宗正自試智勇非不能當誠知故朝為兵所害新帝司徒已定三輔隴西北地從風響應其事昭昭日月經天河海帶地



不足以比死生有命富貴在天天下存亡誠云命也邑  
雖沒身能如命何夫人道之本有恩有義義有所宜恩  
有所施君臣大義母子至恩今故主已亡義無誰為老  
母拘執恩所當留而厲以貪權誘以策馬抑其利心必  
其不顧何其愚乎邑年三十歷位卿士性少嗜慾情厭  
事為况今位尊身危財多命殆鄙人知之何疑君子君  
長敬通揭節垂組自相署立蓋仲由使門人為臣孔子  
譏其欺天君長據位兩州加以一郡而河東叛國兵不

入彀上黨見圍不窺大谷宗正臨境莫之能援兵威屈辱國權日損三王背叛赤眉害主未見兼行倍道之赴若墨翟累繭救宋申包胥重脰存楚衛女馳歸唁兄之志主亡一歲莫知定所虛冀妄言苟肆鄙塞未能事生安能事死未知為臣焉知為主豈厭為臣子思為君父乎欲搖泰山而蕩北海事敗身危要思邑言衍不從或訛言更始隨赤眉在北永衍信之故屯兵界休方移書上黨云皇帝在雍以惑百姓永遣弟叔及子壻張舒誘

降湟城舒家在上黨邑悉擊之又書勸永降永不答自是與邑有隙邑字伯玉馮翊人也後為漁陽太守永衍審知更始已歿乃共罷兵幅巾降於河內帝怨衍等不時至永以立功得贖罪遂任用之而衍獨見黜永謂衍曰昔高祖賞季布之罪誅丁固之功今遭明主亦何憂哉衍曰記有之人有挑其鄰之妻者挑其長者長者詈之挑其少者少者報之後其夫死而取其長者或謂之曰夫非罵爾者邪曰在人欲其報我在我欲其罵人也

夫天命難知人道易守守道之臣何患死亡頃之帝以  
行為曲陽令誅斬劇賊郭勝等降五千餘人論功當封  
以讒毀故賞不行建武六年日食衍首陳八事一曰顯  
文德二曰褒武烈三曰修舊功四曰招俊傑五曰明好  
惡六曰簡法令上曰差祿秩八曰撫邊境書奏帝將召  
見初衍為狼孟長以罪摧陷大姓令狐畧是時畧為司  
空長史讒之於尚書令王護尚書周生豐曰衍所以求  
見者欲毀君也護等懼之即共排間衍不得入後衛尉

陰興信陽侯陰就以外戚貴重深敬重衍衍遂與之交  
結由是為諸王所聘請尋為司隸從事帝懲西京外戚  
賓客故皆以法繩之尤者抵死徙其餘至貶黜衍由此  
得罪嘗自詣獄有詔赦不問西歸故郡閉門自保不敢  
復與親故通建武末衍上疏自陳曰臣伏念高祖之畧  
而陳平之謀毀之則疏譽之則親以文帝之明而魏尚  
之忠繩之以法則為罪施之以德則為功逮至晚世董  
仲舒言道德見妒於公孫弘李廣奮節於匈奴見排於

衛青此忠臣之常所為流涕也臣衍自惟微賤之臣上  
無無知之薦下無馮唐之說乏董生之才寡李廣之勢  
而欲免讒口濟怨嫌豈不難哉臣衍之先祖以忠貞之  
故成私門之禍而臣衍復遭擾攘之時值兵革之際不  
敢回行求時之利事君無傾邪之謀將帥無虜掠之心  
衛尉陰興敬慎周密內自修勅外遠嫌疑故敢與交通  
知臣之貧數欲本業之臣自惟無三益之才不敢處三  
損之地固讓而不受之昔在更始太原執貨財之柄居

倉卒之間據位食祿二十餘年而財產歲狹居處日貧  
家無布帛之積年無輿馬之飾於今遭清明之時飭躬  
力行之秋而怨讐叢興譏議橫世蓋富貴易為善貧賤  
難為工也疏遠壅蔽之臣無望高闕之下惶恐自陳以  
救罪尤書奏猶以前過不用衍不得志退而作賦又自  
論曰馮子以為夫人之德不碌碌如玉落落如石風興  
雲蒸一龍一蛇與道翱翔與時變化夫豈守一節哉用  
之則行舍之則藏進退無主屈伸無常故曰有法無法

因時為業有度無度與物趣舍常務道德之實而不求  
當世之名濶畧杪小之禮蕩佚人間之事正身直行恬  
然肆志顧常好倣儻之策時莫能聽用其謀喟然長歎  
自傷不遭久棲遲於小官不得舒其所懷抑心折節慮  
悽情悲夫伐冰之家不利雞豚之息委積之臣不探市  
井之利況歷位食祿二十餘年而財產益狹居處益貧  
惟夫君子之仕行其道也慮時務者不能興其德為身  
求者不能成其功去而歸家復羈旅於州郡身愈據職



家彌窮困卒離飢寒之災有喪元子之禍先將軍葬渭  
陵哀帝之崩也營之以為園於是以新豐之東鴻門之  
上壽安之中地勢高敞四通廣大南望酈山北屬涇渭  
東瞰河華龍門之陽三晉之路西顧豐鎬周秦之丘宮  
觀之墟通視千里覽見舊都遂定塋焉退而幽居蓋忠  
臣過故墟而歔歔孝子入舊室而哀歎每念祖考著盛  
德於前垂鴻烈於後遭時之禍墳墓蕪穢春秋蒸嘗昭  
穆無列年衰歲暮悼無成功將西田牧肥饒之野殖生

產修孝道營宗廟簡祭祀然後闔門講習道德覽觀乎  
孔老之論庶幾乎松喬之福上隴阪陟高岡游精宇宙  
流目八紘歷觀九州山川之體追覽上古得失之風愍  
道陵遲傷德分崩夫覩其終必原其始故存其人而詠  
其道疆理九野經營五山渺然有思陵雲之意乃作賦  
自厲命其篇曰顯志顯志者言光明風化之情昭章元  
妙之思也文多故不載顯宗即位又多短衍以文過其  
實遂廢於家衍娶北地女任氏悍忌不得畜媵妾兒女

常自操井臼老竟出之遂塹壙於時然有大志不戚戚  
於賤貧居常慷慨歎曰衍少事名賢經歷顯位懷金垂  
紫揭節奉使不求苟得常有凌雲之志三公之貴千金  
之富不得其願不槩於懷貧而不衰賤而不恨年雖疲  
曳猶庶幾名賢之風修道德於幽冥之路以終身名為  
後世法居貧年老卒于家所著賦誄銘說問交德誥慎  
情書記說自序官錄說策五十篇肅宗甚重其文子豹  
字仲文年十二母為父所出後母惡之嘗因豹夜寐欲

行毒害豹走得免敬事愈慎而母疾之益深時人稱其孝長好儒學以詩春秋教授麗山下鄉里為之語曰道德彬彬馮仲文舉孝廉拜尚書郎忠勤不懈每奏事未報嘗伏省閣或從昏至明肅宗聞而嘉之使黃門持被覆豹勅令勿驚由是數加賞賜是時方平西域以豹有才謀拜為河西校尉和帝初數言邊事奏置戊己校尉城郭諸國復率舊職遷武威太守視事二年河西稱之復徵入為尚書永平十四年卒於官

申屠剛字巨卿扶風茂陵人也七世祖嘉文帝時為丞相剛質性方直常慕史鮪汲黯之為人仕郡功曹平帝時王莽專政朝夕猜忌遂隔絕帝外家馮衛二族不得交官剛常疾之及舉賢良方正因對策曰臣聞王事失則神祇怨怒姦邪亂正故陰陽謬錯此天所以譴告王者欲令失道之君曠然覺悟懷邪之臣瞿然自刻者也今朝廷不考功校德而虛納毀譽數下詔書張設重法抑斷誹謗禁割論議罪之重者乃至腰斬傷忠臣之情

挫直士之銳殆乖建進善之旌縣敢諫之鼓闕四門之路明四目之義也臣聞成王幼少周公攝政聽言下賢均權布寵無舊無新唯仁是親動順天地舉措不失然近則召公不悅遠則四國流言夫子母之性天道至親今聖主幼少始免襁褓即位已來至親分離外戚杜隔恩不得通且漢家之制雖任英賢猶援姻戚親疏相錯杜塞間隙誠所以安宗廟重社稷也今馮衛無罪久廢不錄或處窮僻不若民庶誠非慈愛忠孝承上之意夫

為人後者自有正義至尊至卑其勢不嫌是以人無賢  
愚莫不為怨姦臣賊子以之為便不諱之變誠難其慮  
今之保傳非古之周公周公至聖猶尚有累何況事失  
其衷不合天心者哉昔周公先遣伯禽守封於魯以義  
割恩寵不加後故配天郊祀三十餘世霍光秉政輔翼  
少主修善進士名為忠直而尊其宗黨摧抑外戚結貴  
據權至堅至固終沒之後受禍滅門方今師傅皆以伊  
周之位據賢保之任以此思化則功何不至不思其危

則禍何不到損益之際孔父攸歎持滿之戒老氏所慎  
蓋功冠天下者不安威震人主者不全今承衰亂之後  
繼重敝之世公家屈竭賦斂重數苛吏奪其時貪夫侵  
其財百姓困乏疾疫天命盜賊羣輩且以萬數軍行衆  
止竊號自立攻犯京師燔燒縣邑至乃訛言積弩入宮  
宿衛驚懼自漢興以來誠未有也國家微弱姦謀不禁  
六極之效危於累卵王者承天順地典爵主刑不敢以  
天官私其宗不敢以天罰輕其親陛下宜遂聖明之德



昭然覺悟遠述帝王之迹近遵孝文之業差五品之屬  
納至親之序亟遣使者徵中山太后置之別宮令時朝  
見又召馮衛二族裁與兄職使得執戟親奉宿衛以防  
未然之符以抑禍患之端上安社稷下全保傅內和親  
戚外絕邪謀書奏莽令元后下詔曰剛所言僻經妄說  
違背大義其罷歸田里後莽篡位剛遂避地河西轉入  
巴蜀往來二十許年及隗囂據隴右欲背漢而附公孫  
述剛說之曰愚聞人所歸者天所與人所畔者天所去

也伏念本朝躬聖德舉義兵龔行天罰所當必摧誠天之福非人力也將軍本無尺土孤立一隅宜推誠奉順與朝并力上應天心下醕人望為國立功可以永年嫌疑之事聖人所絕以將軍之威重遠在千里動作舉措可不慎歟今璽書數到委國歸信欲與將軍共同吉凶布衣相與尚有沒身不負然諾之信況於萬乘哉今何畏何利久疑如是卒有非常之變上負忠孝下愧當世夫未至豫言固常為虛及其已至又無所及是以忠言

至諫希得為用誠願反覆愚老之言囂不納遂畔從述  
建武七年詔書徵剛剛將歸與囂書曰愚聞專己者孤  
拒諫者塞孤塞之政亡國之風也雖有明聖之姿猶屈  
己以從衆故慮無遺策舉無過事夫聖人不以獨見為  
明而以萬物為心順人者昌逆人者亡此古今之所共  
也將軍以布衣為鄉里所推廟堂之計既不豫定動軍  
發衆又不深料今東方政教日睦百姓平安而西州發  
兵人人懷憂騷動惶懼莫敢正言羣衆疑惑人懷顧望

非徒無精銳之心其患無所不至夫物窮則變生事急則計易其勢然也夫離道德逆人情而能有國有家者古今未有也將軍素以忠孝顯聞是以士大夫不遠千里慕樂德義今苟欲決意徼幸此何如哉夫天所祐者順人所助者信如未蒙祐助令小人受塗地之禍毀壞終身之德敗亂君臣之節汙傷父子之恩衆賢破膽可不慎哉囂不納剛到拜侍御史遷尚書令光武嘗欲出游剛以隴蜀未平不宜宴安逸豫諫不見聽遂以頭軔

乘輿輪帝遂為止時內外羣官多帝自選舉加以法理  
嚴察職事過苦尚書近臣至乃垂撲牽曳於前羣臣莫  
敢正言剛每輒極諫又數言皇太子宜時就東宮簡任  
賢保以成其德帝並不納以數切諫失旨數年出為平  
陰令復徵拜太中大夫以病去官卒於家

鮑永字君長上黨屯留人也父宣哀帝時任司隸校尉  
為王莽所殺永少有志操習歐陽尚書事後母至孝妻  
嘗於母前叱狗永即去之初為郡功曹莽以宣不附已

欲滅其子孫都尉路平承望風旨規欲害永太守苟諫  
擁護召以為吏嘗置府中永因數為諫陳興復漢室翦  
滅篡逆之策諫每戒永曰君長幾事不密禍倚人門永  
感其言及諫卒自送喪歸扶風路平遂收永弟升太守  
趙興到聞而歎曰我受漢家茅土不能立節而鮑宣死  
之豈可害其子也即勅縣出升復署永功曹時有矯稱  
侍中止傳舍者興欲謂之永疑其詐諫不聽而出興遂  
駕往永乃拔佩刀截馬當胷乃止後數日莽詔書果下

捕矯稱者永由是知名舉秀才不應更始二年徵再遷  
尚書僕射行大將軍事持節將兵安集河東并州朔部  
得自置偏裨輒行軍法永至河東因擊青犢大破之更  
始封為中陽侯永雖為將率而車服敝素為道路所識  
時赤眉害更始三輔道絕光武即位遣諫議大夫儲大  
伯持節徵永詣行在所永疑不從乃收繫大伯遣使馳  
至長安既知更始已亡乃發喪出大伯封上將軍列侯  
印綬悉罷兵但幅巾與諸將及同心客百餘人詣河內

帝見永問曰卿衆所在永離席叩頭曰臣事更始不能令全誠慙以其衆幸富貴故悉罷之帝曰卿言大而意不悅時攻懷未拔帝謂永曰我攻懷三日而兵不下關東畏服卿可且將故人自往城下譬之即拜永諫議大夫永至懷乃說更始河內太守於是開城而降帝大喜賜永洛陽商里宅固辭不受時董憲裨將屯兵於魯侵犯百姓乃拜永為魯郡太守永到擊討大破之降者數千人惟別帥彭豐虞休皮常等各千餘人稱將軍不肯



下頃之孔子闕里無故荆棘自除從講堂至于里門永  
異之謂府丞及魯令曰方今危急而闕里自開斯豈夫  
子欲令太守行禮助吾誅無道邪乃會人衆修鄉射之  
禮請豐等會觀欲因此禽之豐等亦欲圖永乃持牛酒  
勞饗而潛挾兵器永覺之手格殺豐等禽破黨與帝嘉  
其畧封為關內侯遷揚州牧時南土尚多寇暴永以吏  
民疲傷之後乃緩其銜轡示誅彊橫而鎮撫其餘百姓  
安之會遭母憂去官悉以財產與孤弟子建武十一年

徵為司隸校尉帝叔父趙王良尊戚貴重永以事劾良大不敬由是朝廷肅然莫不戒慎永乃辟扶風鮑恢為都官從事恢亦抗直不避彊禦帝曰貴戚且宜斂手以避二鮑其見憚如此永行縣到霸陵路經更始墓引車入陌從事諫止之永曰親北面事人寧有過墓不拜雖以獲罪司隸無所避也遂下車拜哭盡哀而去西至扶風椎牛上苟諫冢帝聞之意不平問公卿曰奉使如此何如太中大夫張湛對曰仁者行之宗忠者義之主也

仁不遺舊忠不忘君行之高者也帝意乃釋後大司徒韓歆坐事永固請之不得以此忤帝意出為東海相坐度田事不實被徵諸郡守多下獄永至城臯詔書迎拜為兖州牧便道之官視事三年病卒子昱字文泉少傳父學客授於東平建武初太行山中有劇賊太守戴涉聞昱有知畧乃就謁請署守高都長昱應之遂討擊羣賊誅其渠帥道路開通由是知名後為泚陽長政化仁愛境內清靜荊州刺史表上之再遷中元元年拜司隸

校尉詔昱詣尚書使封胡降檄光武遣小黃門問昱有  
所怪否對曰臣聞故事通官文書不著姓又當司徒露  
布怪使司隸下書而著姓也帝報曰吾固欲令天下知  
忠臣之子復為司隸也昱在職奉法守正有父風永平  
五年坐救火遲免後拜汝南太守郡多陂池歲歲決壞  
年費常三千餘萬昱乃上作方梁石洫

猶今之水門

水常饒

足溉田倍多民以殷富十七年代王敏為司徒賜錢帛  
什器帷帳除子德為郎建初元年大旱穀貴肅宗召昱

問曰旱既太甚將何以消復災青對曰臣聞聖人理國  
三年有成今陛下始踐天位刑政未著如有失得何能  
致異但臣前在汝南典理楚事繫者千餘人恐未能盡  
當其罪先帝詔言大獄一起寃者過半又諸徙者骨肉  
離分孤魂不祀一人呼嗟王政為虧宜一切還諸徙家  
屬蠲除禁錮興滅繼絕死生獲所如此和氣可致帝納  
其言四年代年融為太尉六年薨年七十餘子德修志  
操有名稱累官為南陽太守時歲多荒災唯南陽豐穰

吏民愛悅號為神父時郡學久廢德乃修起橫舍備俎豆黼冕行禮奏樂又尊饗國老宴會諸儒百姓觀者莫不勸服在職九年徵大司農卒於官子昂字叔雅有孝義節行初德被病數年昂俯伏左右衣不緩帶及處喪毀瘠三年抱負乃行服闋遂潛於墓次不關時務舉孝廉辟公府連徵不至卒於家

郅憚字君章汝南西平人也年十二失母居喪過禮及長理韓詩嚴氏春秋明天文歷數王莽時憚仰占天象

謂友人曰方今鎮歲熒惑並在漢分翼軫之域去而復來漢必再受命福歸有德如有順天發策者必成大功時左隊大夫逢

音錄姓也

並素好士惲說之曰當今上天垂

象智者以昌愚者以亡昔伊尹自鬻輔商立功全人惲竊不遜敢希伊尹之蹤應天人之變明府倘不疑逆俾成天德並奇之使署為吏惲不謁曰文王拔呂尚於渭濱高宗禮傳說於巖築桓公取管仲於射鉤故能立弘烈就元勲未聞師相仲父而可為吏位也非闕天者不

可與圖遠君不授驥以重任驥亦俛首裹足而去耳遂  
不授署西至長安乃上書王莽曰臣聞天地重其人惜  
其物故運璣衡垂日月含元包一甄陶品類顯表紀世  
圖錄豫設漢歷久長孔為赤制不使愚惑殘人亂時智  
者順以成德愚者逆以取害神器有命不可虛獲上天  
垂誠欲悟陛下令就臣位轉禍為福劉氏享天永命陛  
下順節盛衰取之以天還之以天可謂知命矣若不早  
圖是不免於竊位也且堯舜不以天顯自與故禪天下



陛下何貪非天顯以自累也天為陛下嚴父臣為陛下  
孝子父教不可廢子諫不可拒惟陛下留神莽大怒即  
收繫詔獄劾以大逆猶以惲據經讖難即害之使黃門  
近臣脅惲令自告狂病恍惚不覺所言惲乃瞋目詈曰  
所陳皆天文聖意非狂人所能造遂繫須冬會赦得出  
乃與同郡陳敬南遁蒼梧建武三年又至廬江因遇積  
弩將軍傅俊東徇揚州俊素聞惲名乃禮請之上為將  
兵長史授以軍政惲乃誓衆曰無掩人不備窮人於厄

不得斷人肢體裸人形骸放淫婦女時俊軍士猶發冢  
陳尸掠奪百姓憚諫俊曰昔文王不忍露白骨武王不  
以天下易一人之命故能獲天地之應尅商如林之旅  
將軍如何不師法文王而犯逆天地之禁多傷人害物  
虐及枯尸取罪神明今不謝天改政無以全命願將軍  
親率士卒收傷葬死哭所殘暴以明非將軍本意也俊  
從之百姓悅服所向皆下七年俊還京師而上論之憚  
恥以軍功取位遂辭歸鄉里縣令卑身崇禮請以為門

下掾惲友人董子張者父先為鄉人所害及子張病將  
終惲往候之子張垂歿視惲欷歔不能言惲曰吾知子  
不悲天命而痛讐不復也子在吾憂而不手子亡吾手  
而不憂也子張但目擊而已惲因起將客遮仇人取其  
頭以示子張子張見而氣絕惲因而詣縣以狀自首令  
應之遲惲曰為友報讐吏之私也奉法不阿君之義也  
虧君以生非臣節也趨出就獄令跣而追之不及遂自  
至獄令拔刃自向以要惲曰子不從我出敢以死明心

憚得此乃出因病去久之太守歐陽歛請為功曹汝南  
舊俗十月享會百里內縣皆齎牛酒到府醺飲時臨享  
禮訖歛教曰西部督郵繇

音遙  
姓也

延天資忠貞稟姓公方

摧破姦凶不嚴而理今與衆儒共論延功顯之於朝太  
守敬嘉厥休牛酒養德主簿讀書教戶曹引延受賜憚  
於下座愀然前曰司正舉觥以君之罪告謝於天案延  
資性貪邪外方內員朋黨構姦罔上害人所在荒亂怨  
慝並作明府以惡為善股肱以直從曲此既無君又復

無臣惲敢再拜奉觥歛色慙動不知所言門下掾鄭敬  
進曰君明臣直功曹言切明府德也可無受觥哉歛意  
少解曰實歛罪也敬奉觥惲乃免冠謝曰昔虞舜輔堯  
四罪咸服讒言弗庸孔壬不行故能作股肱帝用有歌  
惲不忠孔壬是昭豺虎從政既陷誹謗又露所言罪莫  
重焉請收惲延以明好惡歛曰是重吾過也遂不譙而  
罷惲歸府稱病延亦自退鄭敬素與惲厚見其言忤歛  
乃相招去曰子廷爭繇延君猶不納延今雖去其勢必

還直心無諱誠三代之道然道不同者不相為謀吾不能忍見子有不容君之危盍去之乎惲曰孟軻以彊其君之所不能為忠量其君之所不能為賊惲業已彊之矣障君於朝既有其直而不死職罪也延退而惲又去不可敬乃獨隱於弋陽山中居數月歛果復召延惲於是乃去從敬止漁釣自娛留數十日惲志在從政既乃喟然而歎謂敬曰天生俊士以為人也鳥獸不可與同羣子從我為伊呂乎將為巢許乎而父老堯舜也敬曰

吾足矣初從生步重華於南野謂來歸於松子今幸得  
全軀樹類還奉墳墓盡問孝道雖不從政施之有政是  
亦為政也吾年髦矣安得從子子勉性命勿勞神以害  
生惓於是告別而去敬字次都清志高世光武連徵不  
到惓遂客居江夏教授郡舉孝廉為上東城門候帝嘗  
出獵車駕夜還惓拒關不開帝令從者見面於門間惓  
曰火門遼遠遂不受詔帝乃迴從東中門入明日惓上  
書諫曰昔文王不敢槃於游田以萬人惟憂而陛下遠

獵山林夜以繼晝其如社稷宗廟何暴虎馮河未至之誠誠小臣所竊憂也書奏帝賜布百疋而貶東中門候為參封尉後令惲受皇太子韓詩侍講殿中及郭皇后廢惲乃言於帝曰臣聞夫婦之好父不得之於子況臣能得之於君乎是臣所不敢言雖然願陛下念其可否之計無令天下有議社稷而已帝曰惲善恕已量主知我必不有所左右而輕天下也后既廢而太子意不自安惲乃說太子曰久處疑位上違孝道下近危殆昔高



宗明君吉甫賢臣及有纖介放逐孝子春秋之義母以子貴太子宜因左右及諸皇子引愆退身奉養母氏以明聖教不背所生太子從之帝意聽許惲再遷長沙太守先是長沙有孝子古初遭父喪未葬隣人失火初匍匐樞上以身扞火火為之滅惲歎異之以為首舉後坐事左轉芒長又免歸避地教授著書八篇以病卒子壽字伯孝善文章以廉能稱舉孝廉稍遷冀州刺史時冀部屬郡多封諸王賓客放縱類不檢節壽案察之無所

容貸乃使部從事專住王國又徙督郵舍王宮外動靜  
失得即時馳驛言上奏王罪及劾傳相於是藩國畏懼  
並為遵節視事三年冀土肅清三遷尚書令朝廷每有  
疑議常獨進見肅宗奇其智策擢為京兆尹郡多彊豪  
姦暴不禁三輔素聞壽在冀州皆懷震竦各相檢勅莫  
敢干犯壽雖威嚴而推誠下吏皆願效死莫有欺者以  
公事免復徵為尚書僕射是時大將軍竇憲以王戚之  
寵威傾天下憲嘗使門生齎書詣壽有所請託壽即送

詔獄前後上書陳憲驕恣引王莽以誡國家是時憲征  
匈奴海內供其役費而憲及其弟篤景並起第宅驕奢  
非法百姓苦之壽以府藏空虛軍旅未休遂因朝會譏  
刺憲等厲音正色辭旨甚切憲怒陷壽以買公田誹謗  
下吏當誅侍御史何敞上疏理之得減死論徙合浦未  
行自殺家屬得歸鄉里

蘓竟字伯况扶風平陵人也平帝時竟以明易為博士  
講書祭酒善圖緯能通百家之言王莽時與劉歆等共

典校書拜代郡中尉時匈奴擾亂北邊多罹其禍竟終  
完輯一郡光武即位就拜當郡太守使固塞以拒匈奴  
建武五年冬盧芳略得北邊諸郡帝使偏將軍隨弟屯  
代郡竟病篤以兵屬弟詣京師謝罪拜侍中數月以病  
免初延岑護軍鄧仲况擁兵據南陽陰縣為寇而劉歆  
兄子龔為其謀主竟時在南陽與龔書曉之曰君執事  
無恙走昔以摩研編削之才與國師公從事出入校定  
祕書竊自依依末由自達蓋聞君子愍同類而傷不遇

人無愚智莫不先避害然後求利先定志然後求名昔  
智果見智伯窮兵必亡故變名逃遁陳平知項王為天  
所棄故歸心高祖皆智之至也聞君前權時屈節北面  
延牙乃後覺悟棲遲養德先世數子又何以加君處陰  
中土多賢士若以須臾之間研考異同揆之圖書測之  
人事則得失利害可陳於目何自負畔亂之困不移守  
惡之名乎與君子之道何其反也世之俗儒末學醒醉  
不分而稽論當世疑誤視聽或謂天下迭興未知誰是

稱兵據土可圖非冀或曰聖王未啓宜觀時變倚彊附  
大顧望自守二者之論豈其然乎夫孔丘祕經為漢赤  
制元包幽室文隱事明且火德承堯雖昧必亮承積世  
之祚握無窮之符王氏雖乘閒偷篡而終嬰大戮支分  
體解宗氏屠滅非其效歟皇天所以眷顧跼蹐憂漢子  
孫者也論者若不本之於天參之於聖猥以師曠雜事  
輕自眩惑說士作書亂夫大道焉可信哉諸儒或曰今  
五星失晷天時謬錯辰星久而不效太白出入過度熒

惑進退見態鎮星繞帶天街歲星不舍氐房以為諸如  
此占歸之國家蓋災不徒設皆應之分野各有所主夫  
房心即宋之分東海是也尾為燕分漁陽是也東海董  
憲迷惑未降漁陽彭寵逆亂擁兵王赫斯怒將兵並征  
故熒惑應此憲寵受殃太白辰星自亡新之末失行算  
度以至於今或守東井或沒羽林或徘徊藩屏或躑躅  
帝宮或經天反明或潛藏久沈或衰微暗昧或煌煌南  
北或盈縮成鉤或偃蹇不禁皆大運蕩除之祥聖帝應

符之兆也賊臣亂子徃徃錯互指麾妄說轉相壞誤由  
此論之天文安得遵度哉乃者五月甲申天有白虹自  
子加午廣可十丈長可萬丈正臨倚彌倚彌即黎丘秦  
豐之都是時月入於畢畢為天網主網羅無道之君  
故武王將伐紂上祭於畢求助天也夫仲夏甲申為八  
魁八魁上帝開塞之將也主退惡攘逆流星狀似蚩尤  
旗或曰營頭或曰天槍出奎而西北行至延牙營上散  
為數百而滅奎為毒螫主庫兵此二變郡中及延牙士



衆所共見也是故延牙遂之武當託言發兵實避其殃  
今年比卦部歲坤主立冬坎主冬至水性滅火南方之  
兵受歲禍也德在中宮刑在木木勝土刑制德今年兵  
事畢已中國安寧之效也五七之家三十五姓彭秦延  
氏不得豫焉如何怪惑依而恃之葛藟之詩求福不回  
其若是乎圖讖之占衆變之驗皆君之所明善惡之分  
去就之決不可不察無忽鄙言夫周公之善康叔以不  
從管蔡之亂也景帝之悅濟北以不從吳濞之畔也自

更始以來孤恩背逆歸義同善臧否粲然可不察歟良  
醫不能救無命彊梁不能與天爭故天之所壞人不得  
支宜密與太守劉君共謀降議仲尼栖栖墨子遑遑憂  
人之甚也屠羊救楚非要爵祿茅焦干秦豈求報利盡  
忠博愛之誠憤懣不能已耳又與仲况書諫之文多不  
載於是仲况與龔遂降龔字孟公長安人善論譏扶風  
馬援班彪並器重之竟終不伐其功潛樂道術作記誨  
篇及文章傳世年七十卒於家

楊厚字仲桓廣漢新都人也祖父春卿善圖讖學為公  
孫述將漢兵平蜀春卿自殺臨命戒其子統曰吾緇裘  
中有先祖所傳祕記為漢家用爾其修之統感父遺言  
服闋辭家從捷為周循學習先法又就同郡鄭伯山受  
河洛書及天文推步之術建初中為彭城令一州大旱  
統推陰陽消伏縣界蒙澤太守宗湛使統為郡求雨亦  
即降澍自是朝廷災異多以訪之統作家法章句及內  
織二卷解說位至光祿大夫為國三老年九十卒統生

厚厚母初與前妻子博不相安厚年九歲思令和親乃託疾不言不食母知其旨瞿然改意思養加篤博後至光祿大夫厚少學統業精力思述初安帝永初二年太白入北斗洛陽大水時統為侍中厚隨在京師朝廷以問統統對年老耳目不明子厚曉讀圖書粗識其意鄧太后使中常侍承制問之厚對以為諸王子多在京師容有非常宜亟發遣各令就國太后從之星尋滅不見又尅水退期日皆如所言除為中郎太后特引見問以

圖識厚對不合免歸復修業捷為不應州郡三公之命  
方正有道公車特徵皆不就永建二年順帝特徵詔告  
郡縣督促發遣厚不得已至長安以病自上因陳漢三  
百五十年之厄宜蠲法改憲之道及消伏災異凡五事  
制書褒述有詔太醫致藥太官賜羊酒及至拜議郎三  
遷為侍中特蒙引見訪以時政四年厚上言今夏必盛  
寒當有疾疫蝗虫之害是歲果六州大蝗疫氣流行後  
又連上西北二方有兵氣宜備邊寇車駕臨當西巡感

厚言而止陽嘉三年西塞寇隴右明年烏桓圍度遼將  
軍耿曄永和元年復上京師應有水患又當火災三公  
有免者蠻夷當反叛是夏洛陽暴水殺千餘人至冬承  
福殿災太尉龐參免荆交二州蠻夷殺長吏寇城郭又  
言陰臣近戚妃黨當受禍明年宋阿母與宦者裒信侯  
李元邁姦廢退後二年中常侍張逵等復坐誣罔大將  
軍梁商專恣悉伏誅每有災異輒上消救之法而閹宦  
專政言不得信時大將軍梁冀威權傾朝遣弟侍中不

疑以車馬珍玩致遺於厚欲與相見厚不答固稱病求  
退帝許之賜車馬錢帛歸家修黃老教授門生上名錄  
者三千餘人太尉李固數薦言之太初元年梁太后詔  
備古禮以聘厚遂辭疾不就建和三年太后復詔徵之  
經四年不至年八十二卒於家策書弔祭鄉人謚曰文  
公門人為立廟郡文學掾史春秋饗射常祠之

郎顗字雅先北海安丘人也父宗字仲綏學京氏易善  
風角星算六日七分能望氣占候吉凶常賣卜自奉安

帝徵之對策為諸儒表後拜吳令時卒有暴風宗占知京師當有大火記識時日遣人參候果如其言諸公聞而表上以博士徵之宗恥以占驗見知聞徵書到夜縣印綬於縣廷而遁遂終身不仕顓少傳父業兼明經典隱居海畔延致學徒常數百人晝研精意夜占象度勤心銳思朝夕無倦州郡辟召舉有道方正不就順帝時災異屢見陽嘉二年正月公車徵顓乃詣闕拜章曰臣聞天垂妖象地見災符所以譴告人主責躬修德使正



機平衡流化興政也易內傳曰凡災異所生各以其政  
變之則除消之亦除伏惟陛下躬日昃之聽溫三省之  
勤思過念咎務消祇誨方今時俗奢佚淺恩薄義夫救  
奢必於儉約拯薄無若敦厚安上理民莫善於禮修禮  
遵約蓋惟上興革文變薄事不在下故周南之德關睢  
政本本立道行風行草從澄其源者流清濶其本者末  
濁天地之道其猶鼓籥以虛為德自近及遠者也伏見  
徃年以來園陵數災炎光熾猛驚動神靈易天人應曰

君子不思遵利茲謂無澤厥災孽火燒其宮又曰君高臺府犯陰侵陽厥災火又曰上不儉下不節炎火並作燒居室自頃繕理西苑修復太學宮殿官府多所構飾昔盤庚遷殷去奢即儉夏后畀室盡力致美又魯人為長府閔子騫曰仍舊貫何必改作臣愚以為諸所繕修事可省減廩卹貧民賑贍孤寡此天之意也人之慶也仁之本也儉之要也焉有應天養人為仁為儉而不降福者哉土者地祇陰性澄靜宜以施化之時敬而勿擾

竊見正月以來陰闇連日易內傳曰久陰不雨亂氣也  
蒙之比也蒙者君臣上下相昌亂也又曰欲德不用厥  
異常陰夫賢者化之本雲者雨之具也得賢而不用猶  
久陰而不雨也又頃前數日寒過其節冰既解釋還復  
凝合夫寒往則暑來暑往則寒來此言日月相推寒暑  
相避以成物也今立春之後火卦用事當溫而寒違反  
時節由功賞不至而刑罰必加也宜須立秋順氣行罰  
臣伏案飛候參察庶政以為立夏之後當有震裂涌水

之害又比熒惑失度盈縮往來涉厯輿鬼環繞軒轅火  
精南方夏之政也政有失禮不從夏令則熒惑失行正  
月三日至於九日三公卦三公上應台階下同元首政  
失其道則寒暑反節節彼南山詠自周詩股肱良哉著  
於虞典而今之在位競託高虛納累鍾之奉忘天下之  
憂棲遲偃仰寢疾自逸被策文得賜錢即復起矣何疾  
之易而愈之速以此消伏災眚興致升平其可得乎今  
選舉牧守委任三府長吏不良既咎州郡州郡有失豈

得不歸責舉者而陛下崇之彌優自下慢事愈甚所謂  
大綱疏小綱數三公非臣之仇臣非狂夫之作所以發  
憤忘食懇懇不已者誠念朝廷欲致興平故不能面譽  
也書奏帝復使對尚書顓復條序前章暢其旨趣條便  
宜七事以對一事陵園至重聖神攸馮而災火炎赫迫  
近寢殿寃而有靈猶將驚動尋宮殿官府近始永平歲  
時未積便更修造又西苑之設禽畜是處離房別觀本  
不常居而皆當務精土木營建無已消功殫賄巨億萬

計易內傳曰人君奢侈多飾宮室其時旱其災火是故魯僖遭旱修政自勅下鐘鼓之縣休繕治之官雖則不寧而時雨自降由此言之天之應人敏於影響今月十七日戊午徵日也日加申風從寅來丑時而止丑寅申皆徵也不有火災必當為旱願陛下校計繕修之費永念百姓之勞罷將作之官減彫文之飾損庖厨之饌退宴私之樂易中孚傳曰陽感天不旋日如是則景雲降集肯沴息矣二事去年以來兌卦用事類多不效易傳

曰有貌無實佞人也有實無貌道人也寒溫為實清濁  
為貌今三公皆令色足恭外厲內荏以虛事上無佐國  
之實故清濁效而寒溫不效也是以陰寒侵犯消息占  
曰日乘則有妖風日蒙則有地裂如是三年則致日食  
陰侵其陽漸積所致立春前後溫氣應節者詔令寬也  
其後復寒者無寬之實也夫十室之邑必有忠信率土  
之人豈無貞賢未聞朝廷有所賞拔非以求善贊務  
弘濟元元也宜採納良臣以助聖化三事臣聞天道不

遠三五復反今年少陽之歲法當乘起恐後年已往將  
遂驚動涉歷天門災成戊己今春當旱夏必有水臣以  
六日七分候之可知夫災眚之來緣類而應行有玷缺  
則氣逆於天精感變出以戒人君王之義時有不登  
則損滋徹膳數年以來穀收稍減家貧戶饑歲不如昔  
百姓不足君誰與足水旱之災雖尚未至然君子遠覽  
防微慮萌老子曰人之飢也以其上食稅之多也故孝  
文皇帝絺袍革舄木器無文約身薄賦時致升平今陛



下聖德中興宜遵前典惟節惟約天下幸甚易曰天道無親常與善人是故高宗以享福宋景以延年四事臣竊見皇子未立儲宮無主仰觀天文太子不明熒惑以去年春分後十六日在婁五度推步三統熒惑今當在翼九度今反在柳三度則不及五十餘度去年八月二十四日戊辰熒惑歷輿鬼東入軒轅出后星北東去四度北旋復還軒轅者後宮也熒惑者至陽之精也天之使也而出入軒轅繞還往來易曰天垂象見吉凶其意

昭然可見也禮天子一娶九女嫡媵畢具今宮人侍御  
動以千計或生而幽隔人道不通鬱積之氣上感皇天  
故遣熒惑入軒轅理人倫垂象見異以悟主上昔武王  
下車出傾宮之女表商容之間以理人倫以表賢德故  
天授以聖子成王是也今陛下多積宮人以違天意故  
皇胤多天嗣體莫寄詩云敬天之怒不敢戲豫方今之  
福莫若廣嗣廣嗣之術不可深思宜簡出宮女恣其姻  
嫁則天自降福子孫千億惟陛下丁寧再三留神於此

左右貴倖亦宜惟臣之言以悟陛下蓋善言古者合於  
今善言天者合於人願訪問百僚有違臣言者臣當受  
苟言之罪五事臣竊見去年閏十月十七日己丑夜有  
白氣從西方天苑趨左足入玉井數日乃滅春秋曰有  
星孛于大辰大辰者何大火也大火為大辰罰又為大  
辰北極亦為大辰所以孛一宿而連三宿者言北辰王  
者之宮也凡中宮無節政教亂逆威福衰微則此三星  
以應之也罰者白虎其宿主兵其國趙魏變見西方亦

應三輔凡金氣為變發在秋節臣恐立秋以後趙魏關西將有羗寇叛戾之患宜豫告諸郡使敬授人時輕徭薄賦勿妄繕起堅倉獄備守衛回選賢能以鎮撫之金精之變責歸上司宜以五月丙午遣太尉服干戚建井旗書玉版之策引白氣之異於西郊責躬求愆謝咎皇天消滅祗氣蓋以火勝金轉禍為福也六事臣竊見今月十四日乙卯巳時白虹貫日凡日傍色氣白而純者名為虹貫日中者侵太陽也見於春者政變常也方今

中官外司各各考事其所考者或非急務又恭陵火災  
主名未立多所收捕備經考毒尋火為天戒以悟人君  
可順而不可違可敬而不可慢陛下宜恭已內省以備  
後災凡諸考案并須立秋又易傳曰公能其事序賢進  
士後必有喜反之則白虹貫日以甲乙見者則譴在中  
台自司徒居位陰陽多謬久無虛已進賢之策天下興  
議異人同咨且立春以來金氣再見金能勝木必有兵  
氣宜黜司徒以應天意陛下不早攘之將負臣言遺患

百姓七事臣伏惟漢興以來三百三十九歲於詩三基  
高祖起亥仲二年今在戌仲十年詩汜歷樞曰卯酉為  
革政辛亥為革命神在天門出入候聽言神在戌亥司  
候帝王興衰得失厥善則昌厥惡則亡於易雌雄祕歷  
今值困乏凡九二困者衆小人欲共困害君子也經曰  
困而不失其所其惟君子乎唯獨聖賢之君遭困遇險  
能致命遂志不去其道陛下乃者潛龍養德幽隱屈尼  
即位之元紫宮驚動歷運之會時氣已應然猶恐妖祥

未盡君子思患而豫防之臣以為成仲已竟來年入季  
文帝改法除肉刑之罪至今適三百載宜因斯際大蠲  
法令官名稱號輿服器械事有所更變大為小去奢就  
儉機衡之政除煩為簡改元更始招求幽隱舉方正徵  
有道博採異謀開不諱之路臣陳引際會恐犯忌諱書  
不盡言未敢究暢臺詒顓曰對云白虹貫日政變常也  
朝廷率由舊章何所變易而言變常又言當大蠲法令  
革易官號或云變常以致災或改舊以除異何也又陽

嘉初建復欲改元據何經典其以實對顓對曰方春東  
作布德之元陽氣開發養導萬物王者因天視聽奉養  
時氣宜務崇溫柔遵其行令而今立春之後考事不忌  
秋冬之政行乎春夏故曰虹春見掩蔽日曜凡邪氣乘  
陽則虹霓在日斯皆臣下執事刻急所致殆非朝廷優  
寬之本此其變常之咎也又今選舉皆歸三司非有周  
召之才而當則哲之重每有選用輒參之掾屬公府門  
巷賓客填集送去迎來財貨無已其當遷者競相薦謁



各遣子弟充塞道路開長姦門興致浮偽非所謂率由舊章也尚書職在機衡宮禁嚴密私曲之意差不得通偏黨之恩或無所用選舉之任不如還在機密臣誠愚戇不知折中斯固遠近之論當今之宜又孔子曰漢三百載計歷改憲三百四歲為一德五德千五百二十歲五行更用王者隨天譬猶自春徂夏改青服絳者也自文帝省刑適三百年而輕微之禁漸以殷積王者之法譬猶江河當使易避而難犯故易曰易則易知簡則易

從易簡而天下之理得矣今去奢即儉以先天下改易  
名號隨事稱謂易曰君子之道或出或處同歸殊塗一  
致百慮是知變常而善可以除災變常而惡必致於異  
今年仲竟來年入季仲終季始歷運變改故可改元所  
以順天道也顓又上書薦光祿大夫江夏黃瓊處士漢  
中李固宜蒙徵用任以時政并陳消災之術條便宜四  
事附奏於左一事孔子作春秋書正月者敬歲之始也  
王者則天之象因時之序宜開發德號爵賢命士流寬

大之澤垂仁厚之德順助元氣含養庶類如此則天文  
昭爛星辰顯列五緯循軌四時和睦不則太陽不光天  
地溷濁時氣錯逆霾霧蔽日自立春以來累經旬朔未  
見仁德有所施布但聞罪罰考掠之聲夫天之應人疾  
於影響而自從入歲常有蒙氣月不舒光日不宣曜日  
者太陽以象人君政變於下日應於天清濁之占隨政  
抑揚天之見異事無虛作豈獨陛下倦於萬機帷幄之  
政有所闕歟何天戒之數見也臣願陛下發揚乾剛援

引賢能勤求機衡之寄以獲斷金之利臣之所陳輒以太陽為先者明其不可久闇急當改政其異雖微其事甚重臣言雖約其旨甚廣惟陛下乃眷臣章深留明思二事孔子曰雷之始發大壯始君弱臣彊從解起今月九日至十四日大壯用事消息之卦也於此六日之中雷當發聲發聲則歲氣和王道興也易曰雷出地奮豫先王以作樂崇德殷薦之上帝雷者所以開發萌芽辟陰除害萬物須雷而解資雨而潤故經曰雷以動之雨

以潤之王者崇寬大順春令則雷應節不則發動於冬  
當震反潛故易傳曰當雷不雷太陽弱也今蒙氣不除  
日月變色則其效也天網恢恢疎而不失隨時進退應  
政得失大人者與天地合其德與日月合其明璇璣動  
作與天相應雷者號令其德生養號令殆廢當生而殺  
則雷反作其時無歲陛下若欲除災昭祉順天致和宜  
察臣下尤酷害者亟加廢黜以安黎元則太皓悅和雷  
聲乃發三事去年十月二十日癸亥太白與歲星合於

房心太白在北歲星在南相離數寸光芒交接房心者  
天帝明堂布政之宮孝經鉤命決曰歲星守心年穀豐  
尚書洪範記曰日行中道移節應期德厚受福重華留  
之重華者謂歲星在心也今太白從之交合明堂金木  
相賊而反同合此以陰陵陽臣下專權之異也房心東  
方其國主宋石氏經曰歲星出左有年出右無年今金  
木俱東歲星在南是為出右恐年穀不成宋人飢也陞  
下宜審詳明堂布政之務然後妖異可消五緯順序矣

四事易傳曰陽無德則旱陰僭陽亦旱陽無德者人君  
恩澤不施於人也陰僭陽者祿去公室臣下專權也自  
冬陟春訖無嘉澤數有西風反逆時節朝廷勞心廣為  
禱祈薦祭山川暴龍移市臣聞皇天感物不為偽動災  
變應人要在責已若令雨可請降水可攘止則歲無隔  
并太平可待然而災害不息者患不在此也立春以來  
未見朝廷賞錄有功表顯有德存問孤寡賑恤貧窮而  
但見洛陽都官奔車東西收繫纖介牢獄充盈臣聞恭

陵火處比有光曜明此天災非人之咎丁丑大風掩蔽  
天地風者號令天之威怒昔所以感悟人君忠厚之戒  
又連月無雨將害粟麥若一穀不登則飢者十三四矣  
陛下誠宜廣被恩澤貸贍元元昔堯遭九年之水人有  
十年之蓄者簡稅防災為其方也願陛下早宣德澤以  
應天功若臣言不用朝政不改者立夏之後乃有澍雨  
於今之際未可望也若政變於朝而天不雨則臣為誣  
罔分當鼎鑊書奏特詔拜郎中辭病不就即去歸家至



四月京師地震遂陷其夏大旱秋鮮卑入馬邑城破代郡兵明年西羌寇隴右皆略如顗言後公車徵不行同縣孫禮者積惡凶暴好游俠與其同里人常慕顗名德欲與親善顗不顧以此結怨遂為禮所殺

襄楷字公矩平原隰陰人也好學博古善天文陰陽之術桓帝時宦官專朝政刑暴濫又比失皇子災異尤數延熹九年楷自家詣闕上疏曰臣聞皇天不言以文象設教堯舜雖聖必歷象日月星辰察五緯所在故能享

百年之壽為萬世之法臣竊見去歲五月熒惑入太微  
犯帝坐出端門不軌常道其閏月庚辰太白入房犯心  
小星震動中耀中耀天王也傍小星者天王子也夫太  
微天廷五帝之座而金火罰星陽光其中於占天子凶  
又俱入房心法無繼嗣今年歲星久守太微逆行西至  
掖門還竊執法歲為木精好生惡殺而淹留不去者咎  
在仁德不修誅法太酷前七年十二月熒惑與歲星俱  
入軒轅逆行四十餘日而鄧皇后誅其冬大寒殺鳥獸

害魚鼈城傍竹栢之葉有傷枯者臣聞於師曰栢傷竹  
枯不出三年天子當之今洛陽城中人夜無故叫呼云  
有火先人聲正誼於占亦與竹栢枯同自春夏以來連  
有霜電及大雨雷而臣作威作福刑罰急刻之所感也  
太原太守劉瓚南陽太守成瑨志除姦邪其所誅翦皆  
合人望而陛下受閹豎之譖乃遠加考逮三公上書乞  
哀瓚等不見採察而嚴被譴讓憂國之臣將遂杜口矣  
臣聞殺無罪誅賢者禍及二世自陛下即位以來頻行

誅罰梁寇孫鄧並見族滅其從坐者又非其數李雲上書明主所不當諱杜衆乞死諒以感悟聖朝曾無赦宥而并被殘戮天下之人咸知其冤漢興以來未有拒諫誅賢用刑太深如今者也永平舊典諸當重論皆須冬獄先請後刑所以重人命也頃數十歲以來州郡翫習又欲避請讞之煩輒託疾病多死牢獄長吏殺生自己死者多非其罪鬼神冤結無所歸訴淫厲疾疫自此而起昔文王一妻誕致十子今宮女數千未聞慶育宜修

德省刑以廣螽斯之祚又七年六月十二日河內野王  
山上有龍死長可數十丈扶風有星隕為石聲聞三郡  
夫龍形狀不一小大無常故周易況之大人帝王以為  
符瑞或聞河內龍死諱以為蛇夫龍能變化蛇亦有神  
皆不當死昔秦之將衰華山神操璧以授鄭客曰今年  
祖龍死始皇逃之死於沙丘王莽天鳳二年訛言黃山  
宮有死龍之異後漢誅莽光武復興虛言猶然況於實  
邪夫星辰麗天猶萬國之附王者也不將畔上故星亦

畔天石者安類墜者失勢春秋五石隕宋其後襄公為  
楚所執秦之亡也石隕東郡今隕扶風與先帝園陵相  
近不有大喪必有叛逆案春秋以來及古帝王未有河  
清及學門自壞者也臣以為河者諸侯位也清者屬陽  
濁者屬陰河當濁而反清者陰欲為陽諸侯欲為帝也  
太學天子教化之宮其門無故自壞者言文德將喪教  
化廢也京房易傳曰河水清天下平今天垂異地吐妖  
人厲疫三者並時而有河清猶春秋麟不當見而見孔

子書之以為異也臣前上瑯邪宮崇受干吉神書不合  
明聽臣聞布穀鳴於孟夏蟋蟀吟於始秋物有微而志  
信人有賤而言忠臣雖至賤誠願賜清閒極盡所言書  
奏不省十餘日復上書曰臣伏見太白北入數日復出  
東方其占當有大兵中國弱四夷彊臣又推步熒惑今  
當出而潛必有陰謀皆由獄多冤結忠臣被戮德星所  
以久守執法亦為此也陛下宜承天意理察冤獄為劉  
瓚成瑨虧除罪辟追錄李雲杜衆等子孫夫天子事天

不孝則日蝕星闕比年日蝕於正朔三光不明五緯錯  
戾前者宮崇所獻神書專以奉天地順五行爲本亦有  
興國廣嗣之術其文易曉參同經典而順帝不行故國  
允不興孝冲孝質頻世短祚臣又聞之得主所好自非  
正道神爲生虐故周衰諸侯以力征相尚於是夏育申  
休宋萬彭生任鄙之徒生於其時殷紂好色妲己是出  
葉公好龍真龍游廷今黃門常侍天刑之人陛下愛待  
兼倍常寵繼嗣未兆豈不爲此天官宦者星不在紫宮



而在天市明當給使主市里也今乃反處常伯之位實  
非天意又聞宮中立黃老浮屠之祠此道清虛貴尚無  
為好生惡殺省慾去奢今陛下嗜慾不去殺罰過理既  
乖其道豈獲其祚哉或言老子入夷狄為浮屠浮屠不  
三宿桑下不欲久生恩愛精之至也天神遺以好女浮  
屠曰此但革囊盛血遂不盼之其守一如此乃能成道  
今陛下淫女豔婦極天下之麗甘肥飲美殫天下之味  
柰何欲如黃老乎書上即召詔尚書問狀楷曰臣聞古

者本無官臣武帝末春秋高數游後宮始置之耳後稍見任至於順帝遂益繁熾今陛下爵之十倍於前至今無繼嗣者豈獨好之而使之然乎尚書上其對詔下有司處正尚書承旨奏曰官者之官非近世所置漢初張澤為大謁者佐絳侯誅諸呂孝文使趙談驂乘而子孫昌盛楷不正辭理指陳要務而析言破律違背經藝假借星宿偽託神靈造合私意誣上罔事請下司隸正楷罪遂收送洛陽獄帝以楷言雖激切然皆天文恒象之

數故不誅猶司寇論刑初順帝時琅邪宮崇詣闕上其  
師干吉於曲陽泉水上所得神書百七十卷皆縹白素  
朱介青首朱目號太平清領書其言以陰陽五行爲家  
而多巫覡雜語有司奏崇所上妖妄不經乃收藏之後  
張角頗有其書焉及靈帝立以楷書爲然太傅陳蕃舉  
方正不就鄉里宗之每太守至輒致禮請中平中與荀  
爽鄭玄俱以博士徵不至卒於家

郭伋字細侯扶風茂陵人也高祖父解武帝時以任俠

知名父梵為蜀郡太守伋少有志行哀平間辟大司空  
府三遷為漁陽都尉王莽時為上谷大尹遷并州牧更  
始新立三輔連被兵寇百姓震駭彊宗右姓各擁衆保  
營莫肯先附更始素聞伋名徵拜大馮翊使鎮撫百姓  
世祖即位拜雍州牧再轉為尚書令數納忠諫諍建武  
四年出為中山太守明年彭寵滅轉為漁陽太守漁陽  
既離王莽之亂重以彭寵之敗民多猾惡寇賊充斥伋  
到示以信賞糾戮渠帥盜賊消散時匈奴數抄郡界邊

境苦之伋整勒士馬設攻守之略匈奴畏憚遠迹不敢復入塞民得安業在職五歲戶口增倍潁川盜賊羣起九年徵拜潁川太守召見辭謁帝勞之曰賢能太守去帝城不遠河潤九里冀京師并蒙福也君雖精於追捕而山道險阨自鬪當一士耳深宜慎之伋到郡招懷山賊陽夏趙宏襄城召吳等數百人皆束手詣伋降悉遣歸附農因自劾專命帝美其策不以咎之後宏吳等黨與聞伋威信遠自江南或從幽冀不期俱降駱驛不絕

十一年省朔方刺史屬并州帝以盧芳據北土為寇乃  
調伋為并州牧過京師謝恩帝即引見并召皇太子諸  
王宴語終日賞賜車馬衣服什物伋因言選補衆職當  
簡天下賢俊不宜專用南陽人帝納之伋前在并州素  
結恩德及後入界所到縣邑老幼相攜逢迎道路所過  
問民疾苦聘求耆德雄俊設几杖之禮朝夕與參政事  
始至行部到西河美稷有童兒數百各騎竹馬於道次  
迎拜伋問曰兒曹何自遠來對曰聞使君到喜故來奉

迎伋辭謝之及事訖諸兒復送至郭外問使君何日當

還伋謂別駕從事計日當告之行部既還先期一日伋

為違信於諸兒遂至於野亭須期乃入是時朝廷多舉

伋可為大司空帝以并部尚有盧芳之警且匈奴未安

欲使久於其事故不召伋知盧芳夙賊難卒以力制常

嚴烽候明購賞以結寇心芳將隋昱遂謀脅芳降伋芳

乃亡入匈奴伋以老病上書乞骸骨二十二年徵為太

中大夫賜宅一區及帷帳錢穀以充其家伋輒散與宗

族無所遺餘明年卒年八十六帝親臨弔賜冢塋地

杜詩字公君河內汲人也少有才能仕郡公曹有公平  
稱更始時辟大司馬府建武元年歲中三遷為侍御史  
安集洛陽時將軍蕭廣放縱兵士暴橫民間百姓惶擾  
詩勅曉不改遂格殺廣還以狀聞光武召見賜以榮戟  
復使之河東誅降逆賊楊異等詩到大陽聞賊規欲北  
度乃與長史急焚其船部勒郡兵將突騎赴擊斬異等  
賊遂翦滅拜成臯令視事三歲舉政尤異再遷為沛郡



都尉轉汝南都尉所在稱治七年遷南陽太守性節儉而政治清平以誅暴立威善於計略省愛民役作水排鑄為農器

排音蒲拜反治鑄者為排以吹炭今激水以鼓之也排當作囊古字通用

用力少

見功多百姓便之又修治陂池廣拓土田郡內比室殷足時人方於召信臣故南陽為之語曰前有召父後有杜母詩自以無勞不安久居大郡求欲降避功臣乃上疏曰陛下亮成天工克濟大業偃武修文羣帥反旅海內和合萬世蒙福天下幸甚唯匈奴未譬成德威侮二

垂陵虐中國邊民虛耗不能自守臣恐武猛之將雖勁亦未得解甲橐弓也夫勤而不息亦怨勞而不休亦怨怨恨之師難復責功臣伏覩將帥之情功臣之望冀一休足於內郡然後即戎出命不敢有恨臣愚以為師克在和不在衆陛下雖垂念北邊亦當頗泄用之昔湯武善御衆故無忿驚之師陛下起兵十有三年將帥和睦士卒鳧藻今若使公卿郡守出於軍壘則將帥自厲士卒之復比於宿衛則戎事自百何者天下已安各重性

命大臣以下咸懷樂土不讐其功而厲其用無以勸也  
陛下誠宜虛缺數郡以俟振旅之臣重復厚賞加於久  
役之士如此緣邊屯戍之師競而忘死乘城拒塞之吏  
不辭其勞則烽火精明守戰堅固聖王之政必因人心  
今猥用愚薄塞功臣之望誠非其宜臣詩伏自惟忖本  
以史吏一介之才遭陛下創制大業賢俊在外空乏之  
間超受大恩牧養不稱奉職無效久竊祿位令功臣懷  
愠誠惶誠恐八年上書乞避功德陛下殊恩未許放退

臣詩蒙恩尤深義不敢苟冒虛請誠不勝至願願退大  
郡受小職及臣齒壯力能經營劇事如使臣詩必有補  
益復受大位雖析珪受爵所不辭也惟陛下哀矜帝惜  
其能遂不許之詩雅好推賢數進知名士清河劉統及  
魯陽長董崇等初禁網尚簡但以璽書發兵未有虎符  
之信詩上疏曰臣聞兵者國之凶器聖人所慎舊制發  
兵皆以虎符其餘徵調竹使而已符策合會取為大信  
所以明著國命斂持威重也間者發兵但用璽書或以

詔令如有姦人詐偽無由知覺愚以為軍旅尚興賊虜未殄徵兵郡國宜有重慎可立虎符以絕姦端昔魏之公子威傾鄰國猶假虎符以解趙圍若無如姬之仇則其功不顯事有煩而不可省費而不得已蓋謂此也書奏從之詩身雖在外盡心朝廷謹言善策隨事獻納視事七年政化大行十四年坐遣客為弟報仇被徵會病卒司隸校尉鮑永上言詩貧困無田宅喪無所歸詔使治喪郡邸賻絹千匹

孔奮字君魚扶風茂陵人也曾祖霸元帝時為侍中奮少從劉歆受春秋左氏傳歆稱之謂門人曰吾已從君魚受道矣遭王莽亂奮與老母幼弟避兵河西建武五年河西大將軍竇融請奮署議曹掾守姑臧長八年賜爵關內侯時天下擾亂惟河西獨安而姑臧稱為富邑通貨羌胡市日四合每居縣者不盈數月輒致豐積奮在職四年財產無所增事母孝謹雖為儉約奉養極求珍膳躬率妻子同甘菜茹時天下未定事多不修節操

而奮力行清潔為衆人所笑或以為身處脂膏不能以  
自潤徒益苦辛耳奮既立節治貴仁平太守梁統深相  
敬待不以官屬禮之常迎於大門引入見母隴蜀既平  
河西守令咸被徵召財貨連轂彌竟川澤唯奮無資單  
車就路姑臧吏民及羌胡更相謂曰孔君清廉仁賢舉  
縣蒙恩如何今去不共報德遂相賦斂牛馬器物千萬  
以上追送數百里奮謝之而已一無所受既至京師除  
武都郡丞時隴西餘賊隗茂等夜攻府舍殺郡守賊畏

奮追急乃執其妻子欲以為質奮年已五十惟有一子終不顧望遂窮力討之吏民感義莫不倍用命焉郡多氏人便習山谷其大豪齊鍾留者為羣氏所信向奮乃率鍾留等令要遮鈔擊共為表裏賊窘懼逼急乃推奮妻子以置軍前冀當退卻而奮擊之愈厲遂禽滅茂等奮妻子亦為所殺世祖下詔褒美拜為武都太守奮自為府丞已見敬重及拜太守舉郡莫不改操為政明斷甄善疾非見有美德愛之如親其無行者忿之若讐郡



中稱為清平弟奇游學洛陽奮以奇經明當仕上病去  
官守約鄉閭卒于家奇博通經典作春秋左氏刪奮晚  
有子嘉官至城門校尉作左氏說云

張堪字君游南陽宛人也為郡族姓堪早孤讓先父餘  
財數百萬與兄子年十六受業長安志美行厲諸儒號  
曰聖童先武微時見堪志操常嘉焉及即位中郎將來  
歛薦堪召拜郎中三遷為謁者使送委輸繅帛并領騎  
七千匹詣大司馬吳漢伐公孫述在道追拜蜀郡太守

時漢軍餘七日糧陰具船欲遁去堪聞之馳往見漢說  
述必敗不宜退師之策漢從之乃示弱挑敵述果自出  
戰死城下成都既拔堪先入據其城檢閱庫藏收其珍  
寶悉條列上言秋毫無私慰撫吏民蜀人大悅在郡二  
年徵拜騎都尉後領驃騎將軍杜茂營擊破匈奴於高  
柳拜漁陽太守捕擊姦猾賞罰必信吏民皆樂為用匈  
奴常以萬騎入漁陽堪率數千騎奔擊大破之郡界以  
靜乃於狐奴開稻田八千餘頃勸民耕種以致殷富百

姓歌曰桑無附枝麥穗兩岐張君為政樂不可支視事  
八年匈奴不敢犯塞帝嘗召諸郡計吏問其風土及前  
後守令能否蜀都計掾樊顯進曰漁陽太守張堪昔在  
蜀仁以惠下威能討姦前公孫述破時珍寶山積捲握  
之物足富十世

捲握猶掌握也  
謂珠玉之類

而堪去職之日乘折轅

車布被囊而已帝聞良久嘆息拜顯為魚復長方徵堪  
會病卒帝深悼惜之下詔褒揚賜帛百匹

廉范字叔度京兆杜陵人趙將廉頗之後漢興以廉氏

豪宗自苦陁徙焉世為邊郡守或葬隴西襄武故因仕  
焉曾祖父褒成哀間為右將軍祖父丹王莽時為大司  
馬庸部牧皆有名前世范父遭喪亂客死於蜀漢范遂  
流寓西州西州平歸鄉里年十五辭母西迎父喪蜀郡  
太守張穆丹之故吏乃重資送范范無所受與客步負  
喪歸至葭萌載船觸石破沒范抱持棺柩遂俱沈溺眾  
傷其義鉤求得之療救僅免於死穆聞復馳遣使持前  
資物追范范又固辭歸葬服竟詣京師受業事博士薛

漢京兆隴西二郡更請召皆不應永平初隴西太守鄧融備禮謁范為功曹會融為州所舉按范知事譴難解欲以權相濟乃託病求去融不達其意大恨之范乃變名姓東至洛陽求代廷尉獄卒居無幾融果徵下獄范遂得衛侍左右盡心勤勞融怪其類范而殊不意乃謂曰卿何似我故功曹邪范訶之曰君困厄瞽亂邪語遂絕融繫出困病范隨而往視及死竟不言身自將車送喪至南陽葬畢乃去後辟公府會薛漢坐楚王事誅門

生故人莫敢視范獨往收斂之吏以聞顯宗大怒召范入詰責曰薛漢與楚王同謀交亂天下范公府掾不與朝廷同心而反收斂罪人何也范叩頭曰臣無狀愚慙以為漢等皆已伏誅不勝師資之情罪當萬坐帝怒稍解問范曰卿廉頗後邪與右將軍襄大司馬丹有親屬乎范對曰襄臣之曾祖丹臣之祖也帝曰怪卿志膽敢爾遂賞之由此顯名舉茂才數月再遷為雲中太守會匈奴大入塞烽火日通故事虜過五千人移書傍郡吏

欲傳檄求救范不聽自率士卒拒之虜重盛而范兵不敵會日暮令軍士各交縛兩炬三頭爇火營中星列虜遙望火多謂漢兵救至大驚待旦將退范乃令軍中蓐食晨往赴之斬首數百級虜自相躡藉死者千餘人是後不敢復向雲中後頻歷武威武都二郡太守隨俗化導各得治宜建初中遷蜀郡太守其俗尚文辯好相持短長范每勵以淳厚不受偷薄之說成都民物豐盛邑宇逼側舊制禁民夜作以防火災而更相隱蔽燒者日

屬范乃毀削先令但嚴使儲水而已百姓為便乃歌之  
曰廉叔度來何暮不禁火民安作平生無襦今五袴在  
蜀數年坐法免歸鄉里范世在邊廣田地積財粟以賑  
宗族朋友肅宗崩范奔赴敬陵時廬江郡掾嚴麟奉章  
弔國俱會於路麟乘小車塗深馬死不能自進范見而  
愍然命從車下馬與之不告而去麟事畢不知馬所歸  
乃緣蹤訪之或謂麟曰故蜀郡太守廉叔度好周人窮  
急今奔國喪獨當是耳麟亦素聞范名以為然即牽馬



造門謝而歸之世服其好義然依倚大將軍竇憲以此為譏卒於家初范與洛陽慶鴻為刎頸交時人稱曰前有管鮑後有慶廉鴻慷慨有義節位至瑯邪會稽二郡太守所在有異迹

王堂字敬伯廣漢郫人也初舉光祿茂才遷穀城令治有名迹永初中西羌寇巴郡為民患詔遣中郎將尹就攻討連年不克三府舉堂治劇拜巴郡太守堂馳兵赴賊斬虜千餘級巴庸清靜吏民生為立祠刺史張喬表

其治能遷右扶風安帝西巡阿母王聖中常侍江京等  
並請屬於堂堂不為用掾史固諫之堂曰吾蒙國恩豈  
可為權寵阿意以死守之即日遣家屬歸閉閣上病果  
有誣奏堂者會帝崩京等悉誅堂以中正見稱永建二  
年徵入為將作大匠四年坐公事左轉議郎復拜魯相  
政存簡一至數年無辭訟遷汝南太守搜賢禮士不苟  
自專乃教掾史曰古人勞於求賢逸於任使故能化清  
於上事緝於下其憲章朝右簡覈才識委功曹陳蕃匡

政理務拾遺補闕任主簿應嗣庶循名責實察言觀效  
焉自是委誠求當不復妄有辭教郡內稱治時大將軍  
梁商及尚書令袁湯以求屬不行並恨之後廬江賊逆  
入弋陽界堂勒兵追討即使奔散而商湯猶因此諷州  
奏堂在任無警免歸家年八十六卒遺令薄斂瓦棺以  
葬子穉清行不仕曾孫商益州牧劉焉以為蜀郡太守  
有治聲

蘓章字孺文扶風平陵人也八世祖建武帝時為右將

軍祖父純字桓公有高名性彊切而持毀譽士友咸憚之至乃相謂曰見蘓桓公患其教責人不見又思之三輔號為大人永平中從奉車都尉竇固軍出擊北匈奴車師有功封中陵鄉侯官至南陽太守章少博學能屬文安帝時舉賢良方正對策高第為議郎數陳得失言甚切直出為武原令時歲飢輒開倉廩活三千餘戶順帝時遷冀州刺史故人為清河太守章行部按其姦臧乃請太守為設酒肴陳平生之好甚歡太守喜曰人皆

有一天我獨有二天章曰今夕蘓孺文與故人飲者私恩也明日冀州刺史按事者公法也遂舉正其罪州境知章無私望風畏肅換為并州刺史以摧折權豪忤旨坐免隱身鄉里不交當世後徵為河南尹不就時天下日敝民多愁苦論者舉章有幹國才朝廷不能復用卒于家兄曾孫不韋字公先父謙初為郡督郵時魏郡李暉為美陽令與中常侍具瑗交通貪暴為民患前後監司畏其勢援莫敢糾問及謙至部案得其臧論輸左校

謙累遷至金城太守去郡歸鄉里漢法免罷守令自非  
詔徵不得妄到京師而謙後私至洛陽時嵩為司隸校  
尉收謙詰掠死獄中嵩又因刑其尸以報宿怨不韋時  
年十八徵詣公車會謙見殺不韋載喪歸鄉里瘞而不  
葬仰天嘆曰伍子胥獨何人也乃藏母於武都山中遂  
變名姓盡以家貲募劍客邀嵩於諸陵間不尅會嵩遷  
大司農時右校尉詹在寺北垣下不韋與親從兄弟潛  
入詹中夜則鑿地晝則逃伏如此經月遂得傍達嵩之

寢室出其牀下值曷在廁因殺其妾并及小兒留書而  
去曷大驚懼乃布棘於室以板藉地一夕九徙雖家人  
莫知其處每出輒劔戟隨身壯士自衛不韋知曷有備  
乃日夜飛馳徑到魏郡掘其父阜冢斷取阜頭以祭父  
墳又標之於市曰李君遷父頭曷匿不敢言而自上退  
位歸鄉里私掩塞冢槨捕求不韋歷歲不能得曷恚感  
傷發病歐血死不韋後遇赦還家乃始改葬行喪士大  
夫多譏其發掘冢墓歸罪枯骨不合古義惟任城何休

方之伍員太原郭林宗聞而論之曰子胥雖云逃命而  
見用彊吳憑闔廬之威因輕悍之衆雪怨舊郢曾不終  
朝而但鞭墓戮尸以舒其忿竟無手刃後主之報豈如  
蘓子單特子立靡因靡資彊讐豪援據位九卿城闕天  
阻官府幽絕埃塵所不能過霧露所不能沾不韋殺身  
焦慮出於百死冒觸嚴禁陷族禍門雖不獲逞為報已  
深况復分骸斷首以毒生者使曷懷忿結不得其命猶  
假手神靈以斃之也力唯匹夫功隆千乘比之於員不



以優乎議者於是貴之後太傅陳蕃辟不應為郡五官掾初弘農張奐睦於蘓氏而武威段熲與奐素善後奐熲有隙及熲為司隸以禮辟不韋不韋懼之稱病不詣熲既積忿於奐因發怒乃追咎不韋前報暱事以為暱表治謙事被報見誅君命天也而不韋仇之又令長安男子告不韋多將賓客奪舅財物送使從事張賢等就家殺之乃先以鳩與賢父曰若賢不得不韋便同飲此賢到扶風郡守使不韋奉謁迎賢賢即時收執并其一

門六十餘人盡誅滅之諸蘓以是衰破及段熲為楊球所誅天下以為蘓氏之報焉

羊續字興祖泰山平陽人也其先七世二千石卿校祖父侵安帝時司隸校尉父儒桓帝時為太常續以忠臣子孫拜郎中去官後辟大將軍竇武府及武敗坐黨事禁錮十餘年幽居守靜及黨禁解復辟太尉府四遷為廬江太守後楊州黃巾賊攻舒焚燒城郭續發縣中男子二十以上皆持兵勒陣其小弱者悉使負水灌火會

集數萬人并勢力戰大破之郡界平後安風賊戴風等  
作亂續復擊破之斬首三千餘級生獲渠帥其餘黨輩  
原為平民賦與佃器使就農業中平三年江夏兵趙慈  
反殺南陽太守秦頡攻沒六縣拜續為南陽太守當入  
郡界乃羸服間行侍童子一人觀歷縣邑採問風謠然  
後乃進其令長貪潔吏民良猾悉逆知其狀郡內驚悚  
莫不震懾乃發兵與荊州刺史王敏共擊慈斬之獲首  
五千餘級屬縣餘賊並詣續降續為上言宥其枝附賊

既清平乃班宣政令候民病利百姓歡服時權豪之家

多尚奢麗續深疾之常敝衣薄食車馬羸敗府丞常獻

其生魚續受而縣於庭丞後又進之續乃出前所縣者

以杜其意續妻後與子祕俱詣郡舍續閉門不內妻自

將祕行其資藏唯有被衾敝祗裊

祗裊短衣也廣雅云  
即襜褕也祗丁奚反

裊丁  
勞反鹽麥數斛而已顧勅祕曰吾自奉若此何以資爾

母乎使與母俱歸六年靈帝欲以續為太尉時拜三公

者皆輸東園禮錢千萬令中使督之名為左騶其所之

往輒迎致禮敬厚加贈賂續乃坐使人於單席舉緼袍以示之曰臣之所資唯斯而已左騶白之帝不悅以此故不登公位而徵為太常未及行會病卒年四十八遺言薄斂不受賄遺舊典二千石卒官賻百萬府丞焦儉遵續先志一無所受詔書褒美勅泰山太守以府錢百萬賜續家云

賈琮字孟堅東郡聊城人也舉孝廉再遷為京兆尹有政理迹舊交趾土多珍產明璣翠羽犀象瑇瑁異香美

木之屬莫不自出前後刺史多無清行上承權貴千積私賂財計盈給輒復求見遷代故吏民怨叛中平元年交趾屯兵反執刺史及合浦太守自稱柱天將軍靈帝特勅三府精選能吏有司舉琮為交趾刺史琮到部訊其反狀咸言賦斂過重百姓空單京師遙遠告寃無所民不聊生自活故聚為盜賊琮即移書告示各使安其資業招撫荒散蠲復徭役誅斬渠帥為大害者簡選良吏試守諸縣歲間蕩定百姓以安巷路為歌曰賈父來

晚使我先反今見清平吏不敢飯在事三年為十三州  
最徵拜議郎時黃巾新破兵凶之後郡縣重斂因緣生  
姦詔書沙汰刺史二千石更選清能吏乃以琮為冀州  
刺史舊典傳車驂駕垂赤帷裳迎於州界及琮之部升  
車言曰刺史當遠視廣聽糾察美惡何有反垂帷裳以  
自掩塞乎乃命御者褰之百城聞風自然竦震其諸臧  
過者望風解印綬去惟瘿陶長濟陰董昭觀津長梁國  
黃就當官待琮於是州界翕然靈帝崩大將軍何進表

琮為度遼將軍卒官

陸康字季寧吳郡吳人也祖父續在獨行傳父褒有志操連徵不至康少仕郡以義烈稱刺史臧旻舉為茂才除高城令縣在邊垂舊制令戶一人具弓弩以備不虞不得行來長吏新到輒發民繕修城郭康至皆罷遣百姓大悅以恩信為治寇盜亦息州郡表上其狀光和元年遷武陵太守轉守桂陽樂安二郡所在稱之時靈帝欲鑄銅人而國用不足乃詔調民田畝斂十錢而比水




旱傷稼百姓貧苦康上疏諫曰臣竊聞詔書畝斂田錢  
鑄作銅人伏讀惆悵悼心失圖夫什一而稅周謂之徹  
徹者通也言其法度可通行萬世也故魯宣稅畝而稼  
災自生哀公增賦而孔子非之豈有聚奪民物以勞無  
用之銅人捐捨聖戒自蹈亡王之法哉傳曰君舉必書書  
而不法後世何述焉書奏內倖因此譖康援引亡國以  
譬聖明大不敬檻車徵詣廷尉侍御史劉岱典考其事  
岱為表陳解釋免歸田里復徵拜議郎會廬江賊黃穰

等與江夏蠻連結十餘萬人攻沒四縣拜康廬江太守  
康申明賞罰擊破穰等餘黨悉降帝嘉其功拜康孫尚  
為郎中獻帝即位天下大亂康蒙險遣孝廉計吏奉貢  
朝廷詔書策勞加忠義將軍秩中二千石時袁術屯兵  
壽春部曲飢餓遣使求委輸兵甲康以其叛逆閉門不  
通內修戰備以禦之術大怒遣其將孫策攻康圍城數  
重康固守吏士有先受休假者皆遁伏還赴暮夜緣城  
而入受敵二年城陷月餘發病卒年七十家族百餘人

遭離飢厄死者將半朝廷愍其守節拜子雋為郎中少  
子績仕吳為鬱林太守吳史有傳

通志卷一百七下



總校官庶吉士臣侍朝

校對官助教臣金學詩

謄錄監生臣江長鎰